

Menjauhi Kemungkaran Akhlak

Daripada Qutbah bin Malik RA berkata bahawasanya Rasulullah SAW bersabda:

اللَّهُمَّ جَنِّبْنِي مُنْكَرَاتِ الْأَخْلَاقِ، وَالْأَعْمَالِ، وَالْأَهْوَاءِ، وَالْأَدْوَاءِ

Maksudnya: "Ya Allah jauhkanlah aku dari segala kemungkaran akhlak, amalan, hawa nafsu, dan penyakit."

Riwayat al-Tirmizi (3591) dan al-Hakim telah mensahihkannya (1/714). Lafaz hadis telah dipersetujui oleh Imam al-Zahabi

Pedoman dan Iktibar Hadis

Antaranya:

1. Mengikut Kamus Dewan Edisi Keempat, *bahagia* ialah *suasana senang dan aman, aman damai serta gembira*. Sedangkan *kebahagiaan* pula ialah *perasaan bahagia, kesenangan hidup, kemujuran dan keberuntungan*.
2. Hadis ini menunjukkan bahawa betapa Nabi Muhammad SAW memohon kepada Allah SWT supaya dijauhkan daripada nilai dan etika yang tidak baik, akhlak yang rendah dan rosak, boleh menyebabkan seseorang lebih teruk dan hina daripada binatang.
3. Hadis di atas Rasulullah SAW memohon perlindungan Allah SWT daripada empat perkara:
 - i. **Akhlak yang mungkar**, kerana ianya bercanggah dengan matlamat diutuskan Rasulullah SAW sebagaimana riwayat al-Jarud dan lain lagi, sabda Rasulullah SAW:

إِنَّمَا بُعِثْتُ لِأَتَمِّمَ مَكَارِمَ الْأَخْلَاقِ

Maksudnya: “*Sesungguhnya aku diutuskan semata-mata untuk menyempurnakan segala akhlak yang mulia.*”

ii. Amalan yang mungkar. Natijah daripada akhlak yang merupakan amalan hati jika sekiranya rosak dan buruk mengakibatkan perlakuan dan perangai yang buruk. Ini kerana hati sebagai raja dan rakyat yang mematuhi adalah segala anggota. Benarlah sabda Nabi SAW:

أَلَا إِنَّ فِي الْجَسَدِ مُضْغَةً، إِذَا صَلَحَتْ صَلَحَ الْجَسَدُ كُلُّهُ، وَإِذَا فَسَدَتْ فَسَدَ الْجَسَدُ كُلُّهُ، أَلَا وَهِيَ الْقَلْبُ

Maksudnya: “*Ketahuilah sesungguhnya pada jasad terdapat segumpal darah, jika elok nescaya eloklah seluruh jasad, dan jika rosak nescaya rosaklah seluruh jasad, ketahuilah itulah hati.*”

Riwayat al-Bukhari

iii. Kemunggaran hawa nafsu. Ini kerana nafsu yang tidak dibataskan oleh syariah Ilahi akan melakukan pelbagai jenis kemaksiatan dan kejahatan. Ianya akan dirancang dan diatur untuk mengikut tuan nafsu tersebut. Hal ini sudah tentu membawa kecelakaan dan kerugian yang sebenarnya bagi mereka yang mengikut nafsu.

iv. Penyakit yang kronik, kerana manusia mempunyai pelbagai jenis penyakit, tetapi jika sekiranya penyakit yang parah dan kritikal ianya menyebabkan manusia lumpuh daripada menunaikan tanggungjawab sebagai seorang muslim, sama ada amanah terhadap Allah atau sesama manusia.

4. Antara penyakit kronik yang Rasulullah SAW mohon perlindungan ialah gila, kusta, penyakit sopak dan penyakit-penyakit yang dianggap kritikal atau bahaya pada zaman ini seperti kanser, AIDS, HIV dan lain-lain.

Mutiara Hikmah

- ❖ **Pujangga berkata:** Akhlak yang buruk itu azab, kedengkian itu racun, *ghibah* atau mengumpat itu kerendahan dan mengintai-intai kesalahan orang merupakan kehinaan.
- ❖ **Pujangga berkata:** Sebaik-baik yang ada di dunia ini adalah keimanan yang benar, akhlak yang lurus, akal yang sihat, fizikal yang kuat dan rezeki yang mengalir. Sementara di luar itu semua adalah kesibukan semata-mata.

Kisah Teladan

Diriwayatkan daripada sebahagian pengikut Imam Ahmad bin Hanbal RA bahawa dia berkata:

Apabila Imam Ahmad bin Hanbal RA wafat, saya bermimpi beliau sedang berjalan-jalan dan bersiar-siar dalam keadaan gembira, maka saya bertanya kepadanya: Hai saudaraku engkau bergaya di dalam perjalananmu dalam keadaan riang dan bersuka ria? Dia menjawab: Beginilah khadam-khadam Allah iaitu orang-orang yang berkhidmat kepada Allah di dunia bila dia berjalan dan bersiar-siar di dalam syurga Darussalam! Apa yang telah dilakukan Allah kepadamu? Tanyaku pula kepadanya. Allah telah mengampunkan aku dan diberi-Nya aku balasan yang baik-baik, di antaranya ialah sepasang kasut ini yang dibuat dari emas merah, jawabnya padaku.

Oh, ini barangkali kerana hujahmu bahawa al-Quran itu *kalamullah* yang *qadim* yang diturunkan kepada manusia dan dia bukan makhluk (baru) aku bertanya ingin minta kepastian dan dia menyetujui, Kemudian Imam Ahmad bin Hanbal pun bercerita lagi kepadaku: Maka dikatakan kepadaku: Hai Ahmad! Pergilah kemana sahaja yang engkau suka! Lalu saya pun memasuki syurga dan orang yang pertama saya temui ialah Sufyan al-Thauri. Saya melihat dia mempunyai dua sayap untuk terbang dari satu pohon ke pohon yang lain, sedang dia secara terus menerus membaca sepotong ayat al-Quran:

وَقَالُوا الْحَمْدُ لِلَّهِ الَّذِي صَدَقَنَا وَعْدَهُ وَأَوْرَثَنَا الْأَرْضَ نَتَبَوَّأُ مِنَ الْجَنَّةِ حَيْثُ نَشَاءُ فَنِعْمَ أَجْرُ الْعَامِلِينَ

Maksudnya: Serta mereka berkata: Segala puji tertentu bagi Allah yang telah menepati janji –Nya kepada kami, dan yang menjadikan kami mewarisi bumi syurga ini dengan sebeb-bebasnya, kami boleh mengambil tempat dari syurga ini di mana sahaja kami sukai, maka pemberian yang demikian ialah sebaik-baik balasan bagi orang-orang yang beramal.

(Surah al-Zumar: 74)

Kemudian saya bertanya kepadanya pula tentang Abdul Razak, orang yang suka berpidato menasihati orang ramai itu. Maka aku diberitahu oleh Imam Ahmad, bahawa dia telah melihatnya berada di dalam lautan cahaya di atas sebuah kapal dari cahaya juga. Maksudnya dia sedang berada di sisi Allah SWT.

Kemudian aku bertanya pula tentang Bisyr bin al-Hafi, maka jawabnya: Bahagia! Sangat Bahagia! Siapa yang dapat menandingi Bisyr ini! Aku menemuinya sedang berhadapan dengan Tuhan Maha Agung, yang berkata kepadanya: Makanlah, wahai orang yang tidak makan (di dunia), dan minumlah, wahai orang yang tidak minum dan nikmatilah apa sahaja yang kau kehendaki! Tentang Ma`ruf al-Karkhi? Tanyaku kepadanya. Imam Ahmad memberitahuku, bahawa Ma`ruf sedang berada di bawah Arasy, lalu Tuhan Maha Besar bertanya kepada para Malaikat-Nya: Siapa orang ini? Jawab Malaikat: Ya tuhan! Engkau lebih tahu tentang orang ini! Berkata Tuhan: Inilah Ma`ruf al-Karkhi yang selalu mabuk cinta pada-Ku, dan dia tidak akan sedar kecuali sesudah melihat-Ku. Demikian mimpi orang itu dengan Imam Ahmad bin Hanbal RA.